

Sunday, February 22, 2026

Time - 2:30 pm

LAST JOURNEY

Nimin chawhnu dar 2 pelha thi, Manipur Thanlon bialtu MLA Pu Vungzagin Valte ruang chu wawiin hian Mizoram kal tlangin an khaw lama kalpui tura ruahman a ni.

Ruahman dan chuan Delhi atangin thlawhna-in chawhnu dar 2 leh minute 45-ah Lengpui tumhmun thlenpui a ni ang a, dar 4 ah Lengpui tumhmun chhuahsanin dar 6-ah Aizawl Thuampui thlenpui a ni ang a. Zan dar 10-ah Khawdungsei thlenpui tura ruahman a ni . Naktuk zingah lirthei in Manipur panpui a ni ang a, Sinzawl lam atanga kalin a bial Thanlon luhpui a nih hnu-ah zan dar 11 velah New Lamka a an chenna in thlenpui tum a ni. BJP MLA Pu Vungzagin Valte hi May ni 4, 2023 khan,kha tih laia Manipur Chief Minister N. Biren Singh chenna atanga an in lama a haw chu Meitei mipui-in kut lo thlak in thichhawngin a awm a, Delhi-ah enkawl tura phurh thlak a ni a. Damdawi lam thiamte'n kum 3 dawn an enkawl hnu-ah nimin chawhnu lam khan a hliam na tak hi a thihpui ta a ni.

Pu Vungzagin Valte ruang hi tlai dar 4:30 ah Aizawl Bawngkawn South YMA hall-a thlahna inkahawm neih turah Central YMA chuan pangpar leh puan an dah dawn a. Pawl leh mimal engemaw zat a ruang hmuak tur an awm thu dawn a ni.

Prime Minister Pu Narendra Modi chuan Pu Vungzagin Valte a ui thu leh,a thihna chu lungchhiatthlak a tih thu a sawi a. Social media a X account hmangin Prime Minister chuan Manipur mipuite tana a hnathawh chu hriat reng a ni ang a ti a. Khawtlanga a tha zawnga thil danglam thlen tura a thawhnate, Assembly chhunga a thiltihte pawh hriat reng a nih tur thu a sawi a ni.

Chief Minister Pu Lalduhoma pawhin Pu Vungzagin Valte thihna chu pawl a tih thu social media hmangin a sawi a, hun lo taka Pu Vungzagin-a thihna chu Manipur tan mai ni lo, India hmar chhaka Zo hnam awm zawng zawngte tan channa rapthlak tak a ni, a ti. Sorkara dinhmun pawimawh a chelh tawhte tarlangin Pu Lalduhoma chuan Manipur sorkarin Zomi Nam Ni chu chawlhna a puan theihna chu Pu Vungzagin-a vang a ni a ti bawk.

**AI SUMMIT**

India AI Impact Summit 2026 ah Mizoram University Department of Information Technology-a Associate Professor Dr R. Chawngsangpuii a tel.

Union Ministry of Electronics and Information Technology (MeitY) buatsaih India AI Impact Summit 2026 hi Prime Minister Narendra Modi-an Ningani khan New Delhi-a Bharat Mandapam ah a hawng a, he Summit thupui hi “People, Planet and Progress” niin khawvel ram hruaitute, policy siamtute, zirchiangtu lar tak takte leh industry executive-ten chuan economy leh society siamna kawnga Artificial Intelligence (AI) chanvo inthlak danglam zel chungchang an sawiho a ni.

Mizoram University aiawha kal Dr Chawngsangpuii chuan AI Impact Summit 2026 chu khawvel huapa event pawimawhanih thu sawiin, Artificial Intelligence thatna leh mipui a nghawng theih dan te ngaihtuah hona tura duan a ni a ti a, he Summit-a a tel ve thei chu lawmawm a tih thu leh, Technology lama ke pen thin hmeichhiate hnathawh an ngaipawimawhzia tilang nasa hlea a hriat thu a sawi a ni.



CM BIRTHDAY

Vawiin hi Chief Minister Pu Lalduhoma pianchamphaphak a ni a, kum 77 a tlinna a ni.

Prime Minister Pu Narendra Modi chuan social media X hmangin Pu Lalduhoma hi piancham chibai bukin hrisel taka rei tak dam turin duhsakna a hlan a ni. Union Home Minister Pu Amit Shah pawhin Chief Minister hi piancham chibai bukin hriselna leh chakna nena Mizoram mipui rawngbawl zel thei turin duhsakna a hlan ani. Duhsakna hlantu dang zingah Union Minister for DoNER Pu Jyotiraditya Scindia te, BJP MP Sambit Patra leh hruaitu dangte an tel a. Mizoram larsap Gen. Vijay Kumar Singh pawhin piancham chibai bukin Pu Lalduhoma chu hriselna tha, finna leh chakna atana malsawmna dawnga Mizorama remna leh muanna leh hmasawmna atana thawk zel thei turin duhsakna a hlan a ni.

Pu Lalduhoma hi kum 1949 February ni 22 khan Tualpui khua-ah a piang a. IPS-ah lutin a bansan hnu-ah kum 1984 khan Congress party zawmin Lok Sabha MP atan a tling a. Vawi 5 MLA atana thlan tlin niin kum 2023 khan Serchhip assembly bial atangin thlan tlin a ni leh a. A kaihhruai ZPM party chuan kum 2023 kum tawp lama Assembly inthlanah hnehna changin hemi kum December ni 8 khan Mizoram Chief Minister a lo ni ta a ni.



METH SEIZURE

Champhai district Police leh Assam Rifles ten nimin khan Zokhawthar khua-ah methamphetamine tam tham tak an man.

Nimin chawhma dar 11:40 khan Zokhawthar Police station a mite chuan Assam Rifles te nena tangrualin Zokhawthar bul, Tiau lui a Lipui Kai an tih ah Tiau lui kana Motor cycle pakhat lokal chu ringhlelin an enfiah a. He lirthei khalhtu hi Lalramliana (kum 29) Saṭawm khua, Myanmar a Falam District a mi nia inchhal, tuna Tiau Khawmawia cheng mek a ni. Zokhawthar YMA mi leh sa, mi rintlakte hmuh lai ngeiin a hnen atang hian methamphetamine kg. 15 leh gram 916 a rit man a ni a. Ruihhlo bakah hian ruihhlo phurhna atana hman kenbo 125 bike leh inbiakpawhna atana a hman mobile phone te chu man sak nghal nia, Zokhawthar police station ah a tul anga bawhzui turin Narcotic Drugs & Psychotropic Substances Act, 1985 hmangin thubuai ziah luh nghal a ni.

